

Perang Palestin-Israel

Malaysia tak iktiraf keputusan AS kenakan sekatan unilateral

Majlis Keselamatan PBB tidak pernah klasifikasi Hamas sebagai entiti penganas

Oleh Suzalina Halid dan Farah Marshita Abdul Patah
bhnews@bh.com.my

Kuala Lumpur: Malaysia tidak mengiktiraf keputusan mana-mana negara, termasuk Amerika Syarikat (AS) yang mengenakan sekatan secara unilateral terhadap individu, agensi atau negara lain yang memberi sokongan kepada Hamas.

Menegaskan demikian, Perdana Menteri, Datuk Seri Anwar Ibrahim, sebaliknya berkata pendirian Malaysia hanya mengiktiraf keputusan yang dibuat Majlis Keselamatan Pertubuhan Bangsa-Bangsa Bersatu (PBB) yang bersifat multilateral.

“Pertamanya, kita tidak bersetuju dengan cara yang dibuat AS dan keduanya, ia tidak mempengaruhi dasar dan keputusan kita.

“Semalam (kelmarin) saya menghubungi beberapa sahabat dan negara Islam yang memberikan pendirian sama. Sebab itu hubungan dengan Hamas kita teruskan dulu dan sekarang serta tidak menghukum mereka sebagai penganas,” katanya pada sesi Waktu Pertanyaan-Pertanyaan Menteri di Dewan Rakyat, semalam.

Pendirian tetap teguh

Beliau menjawab soalan Wan Ahmad Fayhsal Wan Ahmad Kamal (PN-Machang) yang meminta Perdana Menteri menyatakan apakah pendirian kerajaan berhubung tindakan terkini Dewan Perwakilan AS yang meluluskan Rang Undang-Undang (RUU) Pencegahan Pembiayaan Antarabangsa Hamas untuk mengenakan sekatan terhadap pihak luar yang menyokong Hamas serta pergerakan Jihad Islam Palestin.

Anwar berkata, Hamas tidak



Anwar pada sesi Waktu Pertanyaan-Pertanyaan Menteri di Dewan Rakyat, semalam. (Foto bernama)

pernah diklasifikasikan sebagai entiti atau organisasi penganas oleh Majlis Keselamatan PBB walaupun terdapat cadangan daripada negara Barat untuk ber-

buat demikian.

Katanya, sekiranya Majlis Keselamatan PBB mengklasifikasikan sesebuah entiti sebagai satu organisasi penganas, Ma-

laysia perlu meratifikasi pelaksanaan senarai sekatan dalam penguatkuasaan undang-undang antikeganasan.

“Senarai sekatan ini diselia Kementerian Dalam Negeri. Pada masa sama, pendirian kerajaan Malaysia adalah hanya untuk mengiktiraf sekatan yang diklasifikasikan oleh Majlis Keselamatan PBB dan bukan sekatan sehalu.

“Meskipun pendirian Malaysia tetap teguh dalam menyokong Palestin, namun sekiranya pelaksanaan RUU ini berkuat kuasa, ia dijangka akan memberi kesan kepada Malaysia,” katanya.

Anwar berkata, sebarang sekatan terhadap Malaysia akan mempengaruhi penilaian kerajaan dan syarikat AS terhadap Malaysia serta menjejaskan peluang pelaburan syarikat AS ke Malaysia.

Katanya, kebarangkalian untuk RUU diluluskan di Dewan Negara (Senat) serta ditandatangani Presiden Joe Biden adalah tinggi berikutan kebanyakan anggotanya yang lebih bersifat pro-Israel.